

Los Naipes, Los Corsarios, Los Arubeños, Los Panchos

SOLAMENTE UNA VEZ LO BIRA UN ANOCHI SPECIAL DI BOLERO CU TRIO

**** Informacionnan cu DEN AMBIENTE a haya den forma exclusivo, ta indica cu tur cos ta cla pa un anochi romantico cu boleronan interpreta pa varios trionan internacional y local.**

E anochi aki cu lo hiba e number di **"Solamente una vez"**, y lo wordo teni cuminando 9'or anochi bispo di Dia di Mama.

Segun DEN AMBIENTE a haya informacion, e anochi aki lo conta cu participacion di e trio local **Trio Los Arubeños, Trio Los Corsarios di Corsow, Trio Los Naipes di Venezuela y Trio Los Panchos di Mexico.**

Organisadorman lo a hiba conversacionnan largo y serio cu tanto Sr Tony Thijssen di Trio Los Conquistadores y Jenny Koolman di Trio Los Romanceros pa mira si nan tambe por ta presente e anochi aki, cu sin duda lo bira un anochi unda musica bolero, letranan romantico, musica di amor lo domina e ambiente totalmente y awor ta sperando riba decision di



**** Nos orguyo Trio Los Arubeños..**

e dos trionan aki.

Pa 12'or di anochi tur mamanan lo wordo felicita, ya cu e ora lo ta Dia di Mama y lo brinda pa e ser stima di tur hogar, mientras lo eligi tambe e Mama di Aña 1996.

Aña pasa riba diadomingo dia di Mama tabatin presen-

tacion di Trio Los Panchos na Aruba, cu a bira un exito total y voznan alanta mesora pidiendo pa un repeticion.

E repertorio di Los Panchos e biaha aki lo conta cu cancionnan cu ultimo añanan tabata hit, manera "Voy a perder la cabeza por tu

amor" di Jose Luis Rodriguez, Detalles di Roberto Carlos, e cancion original tango di Carlos Gardel bou titulo "El dia en que me quieras" y varios otro mas. Trio Los Naipes na Aruba tabatin varios hit y si mester menciona uno esaki lo ta "Renzo el Gitano", tema di un telenovela di Radio Caracas Television como 25 anja pasa.

Trio los Corsarios di Corsow te cu dia di awe ta wordo considera e mihor trio cu hamas a yega di existi riba e isla ey y hunto cu nan lo bini den e parti vocal e tremendo cantante Humberto Nivi.

Trio Los Arubeños actualmente ta conoci pa un y tur y ta goza di un fama enorme y no mester di mas introduccion y sin duda un bon decision di tin nan como e representantenan di Aruba.

E anochi aki lo wordo dedica na Adison Croes, conocido locutor pa hopi aña caba, kende den pasado cu su programa dominical a laga e trionan di Aruba de-

saroya y expone nan mes. Tambe den varios ocasion ela organisa competencia entre trionan. Merecidamente organisadorman a dicidi pa dedica e anochi aki na Adison Croes, dunando merito na un yiu di tera cu merece tal.

E aña aki celebracion di Dia di Mama lo ta na grandi cu musica di trio y letranan romantico. No tin record "at all" si hamas Aruba a yega di goza di un show cu tanto trionan internacional asina den dje, manera Trio Los Panchos, Trio Los Naipes y Trio Los Corsarios.

Diadomingo trempa mainta Trio Los Panchos, Trio Los Naipes y Trio Los Corsarios ta viaha pa Corsow, unda den oranan di atardi lo tin un show special pa Dia di Mama den Holiday Beach Hotel.

Su mayan tur hende ta bolbe pa nan pais, lagando atras recuerdonan dushi di un anochi diferente, un anochi cu talvez lo ta pa **"SOLAMENTE UNA VEEEEZ"!!**

Guy Raven a laga sa...

"MI NO TA PARTICIPA DEN SCHRIKKEL JAAR"



**** Durante e Calypso & Roadmarch Contest den Palo Marga Raceway, DEN AMBIENTE a topa cu e Rey di Tumba sin corona Guy Raven, kende a declara na DEN AMBIENTE cu e aña aki e no ta participa den festival di Tumba.**

Segun Guy cu e motibo ta simplemente asina, "e aña aki ta "Schrikkel Jaar", y mi no kier bay spanta e tumberonan, ya cu tur aña nan ta bin tur na temblamento ora nan djis mira costum.

Pero toch mi tin gana di bay, pasobra mi a tende cu Papito no ta bay e biaha aki. Si ta berdad cu Papito no ta bay...anto cashu...ta manera un spiritu lo mi participa e aña aki"....

PAPITO TA BAY OF PAPITO NO TA BAY?

**** Tin tur indicacion cu e tres biaha Rey di Tumba consecutivo lo no bay defende su titulo e aña aki. Esaki ta rumorman cu ta circula.**

DEN AMBIENTE a trata tur manera pa drenta den contacto cu e triple Rey di Tumba, pero tur ora su aparato na su telefon ta contesta "Mi orea ta fluit

aworaki, porfavor hala pa mi pasa, check cu mi despues, doeyyy!..

DEN AMBIENTE a purba via su celular, cua tampoco tambe a resulta envano, ya cu e celular tabata zona.. "bay pageee"... Entodo caso pa otro siman DEN AMBIENTE lo trata pa realiza un entrevista cu Papito na Setar....



E TATA DI TUMBA BOY DAB LO TA NA ARUBA PA PROMOVE SU CD



**** Awe Boy Dap e Rey di Tumba di tur tempo, concidera como e Tata y emperador di Tumba, lo ta na Aruba pa asina promove su disco compacto di Tumba.**

Durante e programa farandulero di DEN AMBIENTE na Radio Galactica awe merdia entre 12'or pa 2'or, Boy Dap lo ta presente, pa asina introduci su C.D.

Pues bo ta keda cordialmente invita pa sintoniza Radio Galactica 99.9 awe merdia, na unda Boy Dap lo los su Tumbanan. Keda pendiente, pasobra lo bay tin un C.D. di Boy Dap na rifa ...